

Hozka eta hozka

Txakur borrokak geldiarazteko ohartarazi dute Animaliak Babesteko Elkarteek



Donostiako txakurtegia gordetako txakur bat.

JAGOBA MANTEROLA

Gipuzkoako eta Nafarroako Animaliak Babesteko Elkarteak lanean ari dira txakur borroken inguruan. Administrazioak behingoz esku har dezan eta animaliei eginiko tratu txarrei buruz legeren bat egin dezan. Bitartean, Hego Euskal Herriko Barne kontseilariak diote ez dagoela nahikoa frogarik borrokak antolatzen dituztenen aurka ezer egiteko.

Alberto Barandiaran/Iruñea

LIZARRA, Iruñerria, Lodosa, Altsasu eta beste hainbat hiri inguruko zelai eta orubeetan edo alde zaharreko gunek apartatu eta ondo babestuetan txakur borrokak izaten dira astero. Bertan 200.000 edo 300.000 pezeta jokatzeko dira, baina izan dira milioi bateko apustuak ere, eta txakur borroketak izan.

Udazken honetan 7.000 sinadura bildu ditu Animaliak Babesteko Nafarroako Elkarteak (ANEDA), Administrazioari ardura gehiago eskatzeko, eta joan den urriaren 29an Barne kontseilari Rafael Gurreak azalpenak eman behar izan zituen Legebiltzarrean, bere esku zeuden datuak argitzeko. Arazoa, baina, ez da Nafarroakoa bakarrik. Gainontzeko probintzietako elkarteek ere badute borroken berri, eta polizia ohartarazten «asperturik» daude. Ez da ezer lortzen. Ofizialki, ez Ertzaintzak, ez Foruzaintzak ez eta udaltzainek ere ez dakite ezer.

Eta badira frogak. 1994ko otsailean, Barakaldoko udaltzaingoak talde bat aurkitu zuen ustez txakur borrokak antolatzen zituena, eta oso zauri larriak zituzten hamabi txakur topatu zituzten Gurutzeta auzoan. 1996ko abuztuan, Guardia Zibilak Lizarrako hilerrian bertan borroka bat geldiarazi zuen. Gurreak azaldu zuenez, Poliziak ezin izan zuen inor atxilotu, «bertan zeudenek esan zituelako txakurrak ez zirela eurenak, kasualitatez zeudela han, eta begira besterik ez zeudela». Aurten, Astigarragako Udaltzaingoak salaketak jaso zituen Txoritokie-

tako harrobietan zeuden txakurren inguruan.

«Ez digute kasurik egiten» • Animaliak Babesteko Elkarteak behin baino gehiagotan egin dute salaketa, baina kexu dira polizien arduradunen jarreraz. «Herritar askok esan izan digute borrokaren bat salatu dutenean ez dietela kasurik egin», azaldu du Carmen Martinek, ANEDAKo kideak. «Jendea beldur da batzuetan, txakurrak lapurtzen dituen jendea delako horren atzetik dabilzanak, eta ez da ausartzen salaketa paratzen. Gainera, gero ez badiete kasurik

egiten...». Poliziak argudiatzen du usteak eta susmoak direla gehienetan, inoiz ezin dela inor bertan harrapatu, eta tartean behin azaldu eta desegiten den gaia dela txakur borrokarena.

Ikerketa guztien arabera, ijito jendea da gehien mugitzen dena. Erabiltzen diren txakur asko ostutakoak dira, entrenatu ondoren edozein txakurren aurrean borroka egiteko prest egoten direnak. Nafarroan egin diren sinadura bilketetan oso toki zehatzak azaldu dira: Ezkaba, Artzapezpikuaren atzeko alde, Sanduzelai —«hor astero egiten dira txakur borrokak», Arrotxapea... Gipuzkoan, Pasaiaiko zezenplaza zaharrean, Astigarragan bertan, Donostiako orube abandonatuetan... «Hemen ez da ikertzeko inolako interesik —dio Gema De la Peñak, Gipuzkoako taldeko kideak—, horrek ez dituelako kezkatzen. Eta guk besterik ez dugu egingo, baina poliziari ederra ematea hara edo hona joan dadin zaintzera...». X

Hainbat proposamen

Joan den urriaren 27an Nafarroako Legebiltzarrean eginiko agerraldian bederatzita puntuko proposamena egin zuen Nafarroako Animaliak Babesteko Elkarteak. Hona hemen garrantzitsuenak.

- ✖ **Araudia berehala:** Nafarroako Gobernuak arau ditzala Animalien Babeserako Legean arautu gabe dauden gaiak, hain zuzen tratu txarrei dagozkienak
- ✖ **Isun gehiago:** Elkarteak uste du zehaztutako isunak oso txikiak direla txakur borroketan mugitzen den diru kopuruarekin alderatuta.
- ✖ **Salaketen nondik norakoa:** Elkarteak jakin nahi du zein diren arrazoiak herritarren salaketak ez atzitzeko, eta zergatik baztertu diren.
- ✖ **Bide egokiak salatzeko:** Foruzaintzaren eta Udaltzaingoaren koordinazio hobea eskatzen du, herritarrei bide eman diezaien salaketak jartzeko.
- ✖ **Polizien arteko lana:** Elkarteak Guardia Zibila ere inplikatu nahi du ikerketetan, eta baita Espainiako Polizia ere.
- ✖ **Sentsibilizazio kanpainak:** Elkarteak Administrazioaren babesa nahi du hezkuntza eta sentsibilizazio kanpainak egiteko, eta bere burua eskaini du poliziei ikastaroak emateko gai honen inguruan.
- ✖ **Animalien baldintzak hobetzea:** Animaliei eragindako tratu txarreetatik jarritako isunen ordaina animalien bizi-baldintzak hobetzeko erabiltzea —instalazio berriak, hezkuntza, toki hobeak...—.

Gizon bat hil da Hernanin trenak harrapatuta

■ Bi egunetan
Gipuzkoan bi lagun
hil dira modu berean

Erredakzioa / Donostia

HERNANIN 72 urteko gizon bat hil zen atzo trenak harrapatuta. Bi eguneko tartean Gipuzkoan modu berean hil den bigarren pertsona da.

Ertzaintzak emandako informazioaren arabera, ezbeharra atzo goizean gertatu zen, 11:15ak aldera. P.M.L. gizonak trenbide ondoan zegoen, Hernaniko geltokian. Ez jakin nola, Gasteiz-Irun bidea egiten duen bidaiari tren batek harrapatu eta airean eraman zuen. Kolpearen ondorioz, instantean hil zen gizona. Istripua gertatu zen gunerajoandako mediku taldeek gizonaren heriotza egiaztatu baino ez zuten egin.

Epaileak gorpua altxatu eta Polloeko Institutu Anatomico Forensera eramateko gindua eman zuen. Ertzaintzak, berriz, diligentziak zabaldu zituen ezbeharra nola gertatu zen zehazte aldera. X

Emakume bat hil da Gasteizen bosgarren pisu batetik erorita

Bilbo / Europa Press

GASTEIZEN emakume bat hil zen atzo eguerdian eraikin bateko bosgarren pisutik erorita. Eusko Jaurlaritzako Barne Saitetik atzo jakinarazi zutenez, ezbeharra Perez Galdos plazan gertatu zen, eguerdiko 12:15etan. Bertsio horren arabera, emakumezkoa etxeko leihotik erori eta momentuan bertan hil zen.

Epailea ezbeharra gertatu zen lekura iritsi eta emakumearen heriotza egiaztatu ondoren altxatu zuten gorpua, eta autopsia egin ziezaioten eraman zuten.

Informazio hau idazteko orduan, artean ez zuten jakinarazi ez hildakoaren izenik ezta ezbeharren arrazoiak ere. X



BEASAINGO UDALA

IRAGARKIA

Udalbatza Osoak, 1998ko azaroaren 26an egindako ohiko bileran, legezko quorumarekin ondorengo erabakia hartu zuen:

LEHENIK. Udalerriko Arau Subsidiarioetako 29.HAKO aurrikusita zegoen konpentsazio iharduketa-sistema lankidetza-sistemagatik aldatzea.

BIGARREN. Hiri Ordenazioaren eta Zoruaren Erregimenari buruzko Legearen Testu Bateratuaren 146,2 artikulua eta Kudeaketa Erregelamenduaren 38,1 artikulua diotenaren arabera, espedienteak jendaurrean jartzea hamabost eguneko epean, Gipuzkoako Aldizkari Ofizialean, Diario Vasco-n eta Euskaldunon Egunkaria-n iragarkiak argitaratuz, bidezkoak diren alegazioak aurkeztu ahal izateko.

Beasainen, 1998ko azaroaren 27an.
ALKATEA, Jon Jauregi Bereziartua.